



BEATA

MARIA



**SALITA AT BUHAY**

NA

**PINANGYARIHAN NG MAG-ASAWA**

NA SI

**JUAN AT SI MARIA**

**SA ASTROCIANG CIUDAD NG IMPERIONG ROMA**

**NANG PANAHOONG UNA**

Ang lalaqui ay pumasoc sa estudio at naguing Pari, at ang babayi naman ay pumasoc sa beaterio, t, nagsilbi sa Monja.



**MANILA**

**PAREDES Y COMPAÑIA**

J. Luna 523, Binondo

Tel. 9580





## PUNO NANG SALITA

Tabi po sa tanang mañga camahalan na narito ñgayon na nagcacapisan ang munting payapa,i, inyong ipautang na cun maquiquinyig nang ipagsasaysay.

O Sagrarióng mahal haring Trinidad Santa, Vírgeng maauain at Iná nang gracia hulugan nang ana ang iyong oveja matuto sa landas nitong pagbabadya.

Cahimanauari houag cong sapitin ang hiya at pula nitong pagtuturing liuanagui Dios isip cong madilim ligtasan ang hiya na babalabalin.

Sa ciencia linagda na dictámeng bigay ni Quinto Horacio, itong cahihiyan, ang casinghalaga,i, isang camatayan lalo,t, sa ganitong mañga Junta Real.

At si Isocratis na daquilang sábio siyang nagpahayag nang isang ejemplo, ang naquiquipulong sa Juntang ganito cun dili umayon di mahal na tauo.

Si Céneca naman cusang nagpahayag nagbigay aprobar nitong pañguñgusap ang tauong lumagay nang sa formalidad capós man sacali tuturiñgang pantás.

Caya po sintabi sa ganang canila mañga camahalan na pauang nobleza acong isang hamac na di novelista sinipi sa inyong mahinahong ciencia.

Ipinagsasaysay sa daquilang libro na sa Catecismo ñgala,i, Histórico na ang camahalan nitong matrimonio catimbang halaga halos itong mundo.

Paris sa nangyari bunying mag-asaua sa Astrociang ciudad nang panahong una, bansag nang pañgalang Juan at María ualang casing galing mañga pagsasama.

Sabihin pa бага ang pagmamahalan nitong mag-asaua nang pagsusunuran ñguni at sa gayong cahumabang arao matrimonio nila hindi nagnanaonao.

Tatlong puong taon na sila,i, nagsama itong matrimonio,i, hindi nagbubuñga palibhasa,i, Dios siyang may talaga di pa calooban magca-anác sila.

Di co pag-aanhin manang isang arao itong mag-asaua ay nag-uulayao uica nang lalaqui sa esposang hirang, mabuti pa yatang quita,i, maghiualay.

Ang sagot ni María sa smatang asaua ; esposo cong ibig icao,i, manaiñga itong matrimonio nang laquing halaga di cun magcagayon ay mortal na sala!

Di anhin na lamang na magaua бага nang ibang may tañgang matrimoniong sadya na di nila ibig maualay sa matá alaala,i, baca sirain nang iba.

Saca icao naman esposo cong guilio itong matrimonio,i, cusang lilisanin ; anó uala бага,t, hindi mo panimdim ang silo ng drago,i, malapit sa atin?

Ang cay Juang sagót yaon ay tanto co labis ang halaga nitong matrimonio sapagea,t, hindi rin namumuñga ito minamagaling cong maghiualay tayo.

Caya sa ganitong hiling nang esposo ay houag isucal nang puso,t, loob mo, saca icao naman ay houag mabuyo sa pacanang pain bitag nang demonio.

Ang uica ni María cun siya mong hiling ga sino na acong di quita susundin yamang aco,i, iyo icao nama,i, aquin pauang mangyayari anomang ibiguin.

Pinagcayarian nilang mag-asaua  
naghiualay na ñga,t, siyang minaganda,  
caya,t, naisipan nitong si María  
nasoc sa Beata,t, nagsilbi sa Monja.

Saca ang lalaqui naisipan naman  
nasoc sa estudio at siya,i, nag-aral  
linoob nang Lañgit at Poong Maycapal  
itong pagcatuto ay sucat pagtae-han.

Dito sa cay Juan sinong di magtaca  
na hindi nalaon natuto pagdaca  
palibhasa,i, Dios siyang may talaga  
nitong pag-aaral na lubhang maganda.

Itong pagcatuto ay ating lisanin  
ang babagtasin co itong pag-oórden  
sa talaga,t, aua nang mag-Inang Vírgen  
cumanta nang misa ay ualang hilahil.

Sa isang destino biniguiang Curato  
sa sacóp ding bayan nang Romang Imperio  
loob nang Maycapal ang pagcapatuño  
sa quinaparunan marañgal na Reino.

Lisanin co ito,t, aquing pabayaan  
ang pobreng Beata,i, siyang pagbalican  
ang pagmamartirio,i, mahaba nang arao  
isang hating-gabi siya,i, nilapitan.

Niyong isang Angel na galing sa Lañgit  
sinugo nang Dios na pinapagsulit  
ano man dao gauin na pagpapasaquit  
ang caliuanaga,i, hindi masasapit.

Hangan hindi ninyo muling pagsamahan  
inyong matrimonio na pinaghiualay  
hindi magcacamit nang Lañgit na bayan  
cun ang matrimonio,i, di haraping tunay.

Nang madaling arao na lubhang malalim  
lumuhod sa Altar siya,i, nanalañgin  
na ang uica baga,t, hiñgi sa pagdaing  
asaua,i, maquita na cun paghanapin.

Saca nang malapit na mag-uumaga  
lumuhod sa harap Madre Santa Clara,  
at saca lumabas lumacad na siya  
tinuño ang bayang quinalagyang sadva.

Doon sa paglacad nang Beatang mahal dinating ang sadya niyang pinarunan, nang siya,i, sumapit itong Padre Juan ang lagay nang misa ay calahatian.

Agad nang pumasoc ang Beatang mahal tuloy na lumuhod sa harap nang Altar, misa,i, nang matapos humalic sa camay saca sa Sacristia Padre,i, nagtuluyan.

Pagdaca,i, sumunod ang pobreng Beata nang datnan ang Padre nunupo sa silla, agad nilapita,t, lumuluha na na nagpatirapang humalic sa paa.

Ang uica nang Padre icao бага,i, sino at natitiguilan ang puso,t, loob co, caya,t, pagsabi na nang matalastas co ang cadahilanan niyang pagparito?

Ang sa Beatang sagot na ipinagsaysay diñgiguin ang aquin na demandang verbal aco,i, may dalauang naging caibigan na sinta capua at sa puso,i, mahal.

Ang isa cong sinta cami may pananim malaon nang arao na di nagsusupling, ang binhing pinunla ay doon nangaling sa dibdib na mahal ni Jesus na guilio.

Anopa,t, sa gayong mahaba nang arao ang aming halama,i, hindi nagnanaonao, ang naging casuyong pagtanim bilang niuica sa aquin cami,i, magbucuran.

Sa sanguning ito,i, pumayag ang loob sa paghahalaman cami ay magbucod, sa isa cong sinta ay doon lumahoc, sa lacad nang mundo,i, eusang tumalicod.

Dito na nag-inot aco,t, nagpananim nang maraming punla sa mahal na Virgen madlang pagal, puyat, saquit at hilahil hañgad co,i, maquita sa pagod ang supling.

Sa gayon nang gayon arao sa paglacad di co alintana ang anomang hirap, di caguinsaguinsa ito,i, namulaclac nang isang hindi co macaya nang saclap.

Nang ito ay aqing matalastas baga  
nalumbay ang puso sampong caloloua,  
ang naisipan co,i, humayin sa sinta  
na aqing devotang Virgen Abogada.

Isinasamo co nang boong dalañgin  
yaong naguing buñga nang aqing pananim,  
ang uica nang Padre ay ;hindi co malining  
aco,i, tapatin mo, niyang pagtuturing!

Antabayanan mo sagot nang Beata  
tapusin ang aquin na haying querella,  
;doon sa pagluhod sa Dios na Ama  
sinugo nang isang Angel na maganda!

Ang bilin nang Dios sa angel na sulit  
anoman dao hirap at pagcacasauit,  
niyaring catauan co,i, ualang masasapit  
di co aabutin liuanag sa Lañgit.

Hangang hindi co rao na paquisamahan  
yaong matrimomnio na pinaghiualay,  
ay di magtatamo nang calualhatian  
bageos madiriin sa lalong mapanglao.

Ngayo,i, panahon nang hanaping mapilit  
yaong naguing palad talaga nang Lañgit,  
sapagca,t, ang punlang laong inihasic  
ñgayo,i, mamumuñga, Dios ang may ibig.

Ito ang dahilan aqing idinulog  
sa mabunying Padre ñgayo,i, lumuluhod  
tugon nang causap parang isinagot  
aco,i, tila rian parang nalalahoc!

Ngunit, tapatin mo nang pagsasalita  
;sa balang bigcas mo,i, tila talinhaga  
yaring pag-iisip nang di humahanga,  
ualang masiluñgan, nitong paghahaca.

Uica nang Beata na ipinagsaysay  
cundi mo antilo ay aqing tuturan,  
;icao ñga ang siya na puno,t, dahilan  
icao ñga ang aqing esposong si Juan.

Aco ñga ang iyong iniuang asaua  
ngala,i, si Mariang nasoc sa Beata,  
acong sinanguning maghiualay quita  
;matrimonio natin di rin nagbubuñga!

At icao rin naman, sa Angel na bilin na pagpilitan cong quita,i, paghanapin, ang pinaghiualay matrimonio natin sa Dios na halal muling pagsamahin.

Natiguil ang loob nang mahal na Padre di nacapag-uica catulad ay pipi, nguni,t, nang magbalie yaong dilidili sa mahal na Beata,i, gayari ang sabi:

Marañgal na Beata ¿ano di tanto mo yaring aqing lagay Vicario ni Cristo? ¿ano di mo malas ang pananamit co eun dapat samahan nitong matrimonio?

Aqing naquilala icao nga,t, di iba Mariang iniuan co na aqing esposa, paanong pangyayari na quita,i, magsama aco,i, Sacerdote at icao,i, Beata.

Yaring aqing órden ¿ano di mo alam? sa lahat nang tauo ay may catungeulan maglinis nang sala sa sino,t, alin man ang hindi cristiano ay aqing binyagan.

Sagot nang Beata na ipinagturing Sacerdote ca nga,t, di co pinupuing nguni,t, balaquin mo,t, iyong pag-isipin itong matrimonio,i, di sucat lisanin.

Marañgal na Padre ito ay tanto mo baca nalilimot ay sasabihin co, di una sa lahat itong matrimonio Sacramentong bigay nang Poong si Cristo.

At una rin naman ang iyong tinanggap itong matrimonio di lihim at hayag, Orden Sacerdotal bagong cayayacap baquit di susundin yaring aqing hañgad.

At isa sa roon Dios ang may bilin matrimonio natin muling pagsamahin sa panahong ito ngayo,i, magsusupling pilit magbubuñga ang ating pananim.

Sa mahal na Padre sagót ay ganito ;icao na babayi yata,i, manunueso! diua,i, maliemata ang pagcalagay mo tumulad pumaris sa banal na tauo.

Hayo na,t, umalis ang iyong parunan  
ang bayan nang apóy na iyong tahanan  
; tingnan mo ang damit sa Beatang saysay  
sa taga inferno,i, cun malalapitan!

Icao Padre Juan ay magmalas-malas  
quilanling mabuti ang naquiquiusap,  
aco nga ang iyo na asauang liyag  
mahabang panahon na hindi nag-anae.

Ngayo,i, malasin mo,t, aqing huhubarin  
damit na Sagrado na sa Monja,i, galing  
ang sagót nang Padre ; anomang sabihin  
di aco papayag, at laban sa órden!

Paano ang aqing pag-amin sa iyo  
aco,i, isang Padreng cay Cristong Vicario  
paanong pagtanggap nitong matrimonio  
maguiguing dalaua itong Sacramento.

Dili baga dating tinanggap nang puso,  
ang sa Beatang sabi na iniaamo  
hindi ngayon lamang na bagong quinuro  
cundi lao,t, laon na naging casuyo.

Sa mañga matuid nilang itinutol  
ang isa at isa,i, ayao na paayon,  
ang uica nang Padre ; ang mabuti ngayon  
sa mañga Vicario tayo ay pahatol!

Pinageasunduan nang dalauang loob  
capua na sila may hañgad sa Dios  
tumupad nang lahat na iniutos  
lumayo sa silo nang mañga demonios.

Sa balang dulugan nila,t, pahatulin  
ang querella nila na cun ipagturing  
sagót sa canila,i, ; hindi maa-amin  
at di nasasacop nang canilang órden!

Pinag-isip nila lalong minatapat  
sa mahal na Papa ay doon humarap  
nañgagtuloy na at sila,i, lumacad  
na cahit matindi sa arao na sicat.

Madali,t, salita nang magsidating na  
sa tinuriñgan na bundoc nang Silva,  
sila ay huminto,t, bilang nagpahiñga  
pag lipas nang init lalacad pagdaca.

Agad nang lumapit sa lilim nang cahoy  
ang pobreng Beata humilig nagtuloy,  
agad nacatulog nang sa hañging simoy  
talaga nang Lañgit ay namatay doon.

Hindi natatanto nitong Padreng mahal  
casamang Beata,i, naquitlan nang buhay  
nang magagabi nang lumamig ang arao  
caniyang dinulog at cusang pinuciao.

Ano,i, nang matanto,t, caniyang maquita  
pumanao ang búhay nang sintang asaua  
nagulo ang loob puso,t, ala-ala  
ualang matutuhan na gauing maganda.

Sa malaquing hapis nang dahil sa liyag  
;ay calunoslunos nasapit nang palad!  
ualang iba,t, cundi sa aquin nagbuhat  
ang dahil nang iyong buhay na nautas.

Halina ang aquing guilio na esposa!  
aquiring cacaluñging dadalhin sa Roma,  
halina at tayo,i, humarap sa Papa,  
at nang mahatulan ang iyong demanda!

Halina ang casi na sinta co,t, liyag  
halina,t, sundin mo aco sa paglacad  
halina at tayo,i, magsabay humarap  
sa Papa,t, ang hatol nang iyong matatap.

Dili aquing sinta guilio cong esposa  
tayo ay mangyaring haharap sa Papa,  
baquit di pa tayo ñgayo,i, lumacad na  
ang sicat nang arao nama,i, malamig na.

Dili baga icao namuhunang tambing  
nang dalita,t, hirap pagod at hilahil  
guinugol ang luha,t, nang ating yacapin  
yaong matrimonio,i, muling pagsamahin.

;Ay cahapishapis! sa iyo,i, nangyari  
dahil sa esposo hiniñga,i, naputi  
acong iyong guilio caya tumatangui  
ñgayo,i, Vicario nang cay Cristong halili.

Cundi dahil doon ;ay casi co,t, guilio!  
mangyari ñga bagang di quita susundin  
di naman papayag ang puso,t, panindim  
bayaang malooy matrimonio natin.

Caya tinitipid nang calooban co  
na yacaping muli yaong matrimonio  
sapagea ñga,t, aco isa sa Ministro  
na eun may asaua,i, contra sa concilio.

Di anong gagauin siyang naguing palad  
iisa na tayo nang ating planetas,  
ang nangyaring ito na casindac-sindac  
sa Dios na Poon ay ipasalamat.

Ngayon ay paano, anong aqing gauin  
di co macacaya na siya ay dalhin  
ang bató sa bundoc ay lubhang matalim  
sa munting bihira aco ay patay rin.

Cun aqing ibalic malayo na naman  
dalhin co,i, gayon din di macacayanan  
ang Padre nag-isip nang ibang paraan  
nang sa Santo Papa,i, huag maauayan.

Nguni,t, naisipan ang lalong magaling  
yamang siya,i, Padre na may dalang órden,  
guinaua ang dapat, Beata,i, ilibing  
sa oras na yaon nang dina gabihin.

Dito rin sa lupa nang bundoc nang Silva  
aqing ililibing ang casi co,t, sinta,  
sa lilim nang cahoy ay inihucay na  
na tumataguisit ang luha sa matá.

¡Aniya ay paalam, paalam na ibig!  
paalam na aco na iyong inusig  
paalam na itong pinagmulang saquit  
pinamuhunanan buhay mong napatid.

Sa aqing pag-alis quita,i, malilisan  
lilisanin quita sa pinaglibiñgan  
aqing uusiguin yaong catuiran  
sa parusa,i, handa yaring aqing buhay.

Ihigita quita sa lupang malamig  
ito ang tubo mo sa puhunang saquit  
at aco,i, haharap sa icapapatid  
nang aqing hiniñga pagdamay co ibig.

Ito ñga ang siyang guinauang maganda  
agad inilibing bangcay nang Beata,  
at saca nagtuloy humarap sa Papa  
sinabi ang bagay pagsasadya niya.

Madali,t, salita nitong pagtuturing  
matulin ang tula na hindi mapiguil,  
ang pagsaltasalta at ibig sapitin  
matalos ang hulo búhay na narating.

Caya ang sino mang dito,i, maquiquinyig  
houag icamangha nang canilang isip  
ito ay ugali nang alin mang auit,  
pagsipi nang verso ay patauid-tauid.

Aquing ipatuloy ang sa Padre Juan  
nang maibigay na boong cagalañgan  
di pa tinatanong ay agad tinuran  
ang haing querella at demandang alay.

Ganito ang sabi na ipinagturing  
marañgal na Santo Papa ay dinguin  
ang pagsasadya co dito ay pagdating  
ayon sa nangyaring napagsapit namin.

Aquing pong casama ang isang Beata  
at aco ang tuñgo nang haing querella  
nang cami ay dumating sa bundoc nang Silva  
búhay ay naquitol sa Dios talaga.

Cami po (aniya,i,) mag-asauang tunay  
nang Beata Mariang namatáy sa daan  
caya po dumulog sa iyong harapan  
ang demandang hain ay pahahatulan.

Sapagea,t, ang amin na nagauang sala  
cami,i, naghiualay, siyang minaganda.  
sa habang panahon niyaong pagsasama  
matrimonio namin ay hindi nagbuñga.

Ito po ang aming pinageayarian  
cami nang esposa caya naghiualay,  
matrimonio namin di rin nagnanaonao  
ito sa Concilio ay naguiguing bawal.

Ang nais nang loob ay aming sinunod  
noon din ay tambing cagyat na bumucod  
isinaisip cong hindi malilimot  
yaong mahalagang pagtauag sa Dios.

Ang naacala co,t, aquing naisipan  
masoc sa estudio at doo,i, mag-aral  
niloob nang Dios at Poong Maycapal  
quinamtan ang gradong pagea Sacerdotal.

Saca po ang aquin na sintang asaua pumasoc sa Beata,t, nagsilvi sa Monja, mahaba nang arao cami,i, di nagsama uala na sa loob nang isa at isa.

Di caguinsaguinsa siya,i, sa lalapit ang luha sa matá catulad ay batis, na isinasamo at hihibichibie nang sabing malubay ganito ang sambit.

Caya naparito at hinanap quita di umano,i, utos nang Dios na Amá, cami rao po,i, muli na cusang magsama matrimonio namin ñgayo,i, mamumuña.

Ito po ang siya na demanda bilang niyaring pagsasadya nami,t, paglalacbay, pagca,t, sa lagay co ay tantong alaňgan icapaparoon sa apóy na bayan.

Sentido,t, potencia nang Papa,i, nagulo sa Laňgit tumiňgin tinutop ang noó **Jesús María,i, Joséf** anong laquing cargo timbang ang halaga nito, itong boong mundo.

Gayon man ay aquin gagauan nang daan upang macacauas nitong casalanan ñgayon din magbalic sa pinaglibiňgan gumaua nang cubo sa dacong ibabao.

Siyam na tinapay na ibibigay co at siyam na tasang tubig ay dalhin mo, sa siyam na buan papaghustuhin mo cacaning mantención sa pagbabantay mo.

Sa gagauing cubo doon ca tatahan hangan di matapos ang siyam na bouan houag na maglabis, ni houag magculang sa dala mong baon yao,i, cahustuhan.

Nguni tantoin mo yaring aquing bilin na cung mayari na ang cubong gagatin, doon matutulog ibabao nang libing malamig na lupa,i, siyang babaniguin.

At eun dumating na ang arao na taning ay iyong pagmasdan ang lagay nang libing anomang maquita,i, houag papansinin ang balang sumipot sa aquin ay dalhin.

Ito ang bilin co houag malimutan itanim sa puso na pacatandaan, caya hayo ca na,t, iyong pagbalican panaho,i, lilipas nang hindi masayang.

Tinangap na lahat bigay na parusa nang Papang marañgal sa nagauang sala at si Padre Juan nama,i, lumacad na tinuño ang bundoc libing nang asaua.

Nang dumating doon gumaua nang agad cubong tatahanan sabihin ang hirap magmula na noo,i, ang pañgañgayayat nang boong cataua,i, naging buto,t, balat.

Nátaoos sa puso ang bilin nang Papa na doon sa cubo siya ay tumira, hinihigan niya,i, libing nang asaua yaong matrimonio,i, upang ding mamuñga.

Sa gayon nang gayon cun ilan nang bouan napansin nang Padre ang pinaglibiñgan lupa,i, tumataas na di mapagbulay puso,i, nagugulong nagecamamanghan.

Ualang patuñgahan ang caniyang puso na uulic--ulic na di magecasundo, ang lahat nang bagay sa dibdib nagtimo dahil sa naquitang hindi mapageuro.

Ang isinaloob na lalong magaling ang bagay na ito ay alintanahin, darating ang arao aqing malilining sa mahal na Papa na ipinagbilin.

Sa dami nang saquit na tiniis niya ang siyam na bouan ay nang dumating na ang lupa,i, tumubo búrol ang capara nang pinaglibiñgan sa sintang asaua.

Yaong cahustuhan nang siyam na bouan libing nang asaua na binabantayan, misteriong himala na cababalaghan milagro,t, paquita nang Dios na mahal.

Icandalauang puo bouan nang Enero nang ito,i, mahayag arao nang Sábado, nang madaling arao como a las cuatro ay siyang paglabas nang milagrong ito.

Ang bundoc na ito,i, tambing lumiuanag  
ang bituing astro ang siyang catulad,  
namanghá ang Padre,i, dito napagmalas  
ang isip ay arao sa tanghaling sicat.

Nililiguid niya ang pinaglibiñgan  
nang sintang asaua na binabantayan  
di cariñgat-diñgat ang lupa,i, nalahang  
mingsang nanambulat, asó ang cabagay.

Siya nang paglabas bangeay nang Beata  
buntis na cagampan at mañgañganac na,  
naualan nang diua isip ala-ala  
ang mahal na Padre dito sa naquita.

Minamasdan niya ang asuang hirang  
hangang sa bago pang Aurora,i, manuñgao  
pagtindi nang sicat ay lumabas naman  
ang sangol na bata sa Beatang tiyan .

Agad siinapupo nitong Padreng bantog  
ang sa matrimonio na buñgang nahinog,  
nañgagcacasalio ang tua at lunos  
habág at ligaya sa anác na irog.

Taguri nang amá sa anác na supling  
;ay cahapis-hapis! nitong aquing guilio  
na uala anomang sucát na damputin  
ibalot sa iyo cahit isang lampin.

Ibang mañga sangol bagong casisipot  
handa na ang lahat talagang pangbalot,  
may sadyang pamatid pamutol nang púsod  
saca may iná pang sucát na mageuceop.

Dito,i, ualang uala sucát cang mapuló  
iputol nang púsod cundi yaring cuco,  
maguing parang lampin capirasong manto  
pagtiis na bunso,t, na sa ilang tayo.

Bata,i, binalot na,t, di caalam-alam  
ay cusang napauí ang caliuanagan  
nagsaoli sa rati ang lagay nang arao  
palibhasa,i, Dios ang may calooban.

Ang Espirito Santo tinapatan sila  
at sampo nang Virgeng masaclolong Ina  
bitoin at astro gayon ding gumaya  
at ipararapit ang bunyíng Beata.

At isang liuanag sa lañgit ay galing  
na hulog nang Dios dito sa nagmartir,  
at nanaog naman ang mañga Querubin  
na nagecactahan toua,i, di sabihin.

Calolouang mahal ang siyang quinuha  
niyong sugong Angel na labingdalaua,  
ipinag-aauit dinala sa Gloria  
ñguni,t, yaong bangeay sa libing natira.

At agad napaui mahal na liuanag  
nang maipanhic na ang santang mapalad  
at ang nanatili ang cay Febong sicat  
nag-uli sa dating canilang calidad.

Ang Padre,i, nag-isip at nagdilidili  
ang cung ano baga ang gagauing mabuti  
ang nasoc sa loob niyang nanatili  
magbalic sa Papa,t, ito,i, ipagsabi.

At saca ang bata,i caniyang hayin  
yayamang sa Papa ito,i, siyang bilin  
na cahit anomang sumipot sa libing  
cunin co at saca caniya ay dalhin.

Pagdaca,i, quinalong ang anac na hirang  
nagbalic sa Roma sa Papang marañgal,  
madali,t, salita,i, dumating pagcouan  
nagbigay nang galang na caugalian.

Marañgal na Papa ang iyo pong bilin  
guinanap cong lahat at ualang pinouing  
nasa nang loob na ibig tantoin  
ang maguiguing hatol sa querellang hayin.

Yamang nasunod co bigay mong parusa  
na ualang nalisin di co tinalima,  
narito ang señal ñgayo,t, aqing dala  
ang sangol na anac nang pobreng Beata.

At nang maganap na ang siam na bouan  
parusang bigay mo aqing pagbabantay,  
pumutoc ang lupa na pinaglibiñgan  
bangeay nang Beata,i, buntis nang lumitao.

Anac po,i, narito at siya cong dala  
na loob nang Dios na itinalaga  
¡aba naquita mo! ang uica nang Papa  
itong matrimonio nang laqing halaga.

Di baga marami itong sacramento pito ang habilin nang Poong si Cristo na ipinamana sa lahat nang tauo ay una sa lahat itong matrimonio.

Disin cun hindi sana cayo naghiualay matrimonio ninyo ay di sinauaan di sana nagecamit nang parusang iyan at mag-aanae din cun humabang arao.

Paglabag sa Dios daraquilang Ama yaong matrimonio,i, inaring hamae na ang habag sa inyo ay nagsilbi baga caya,t, nilapatan nang dusa ang sala.

Ngunit,t, anhin yaon ating pasayurin aqing bibinyagan ang anac mong guilio dito,i, ualang ibang sucat ipag-anquin icao ang padrino nang iyo ring supling.

Caya hauacan mo,t, aqing bibinyagan ang sangol na bata lalagyan nang ngalan ang bundoc nang Silva,i, siyang uuañgisan pagca,t, doon tubo ang lupang catauan.

Tubig ay handa na,t, binusan sa ulo tuloy nginalanan nang Padre Gregorio sa buundoc nang Silva nagecatauang tauo ngalan mo,i, Silvestre sapagea cristiano.

Ano,i, nang matapos nañgang mabinyagan sa Santo Bautismo bata,i, masangcapan at si Padre Juan ay pinañaralan nang ucol at dapat igau sa buhay.

Itong iyong anac ngayon ay dalhin mo bilin co,i, tandaan at isapuso mo cun ipagcaloob nang Poong si Cristo cun siya,i, lumaqui papag-aralin mo.

Hangan sa ang edad ay di sumasacay labing tatlong taon ang caniyang lagay itong pagcatao,i, houag ipamalay nang hindi maaba sa caniyang buhay.

Sa gayong panahon cun ito,i, sumapit dapat magcaroon nang sariling isip ina ay cun cahit caniyang mabatid may loob na siyang tumauag sa lañgit.

Ito,i, tandaan mo houag malimutan  
caya hayo ca na,t, mouing magbiglaan  
doon sa bayan mo cun icao,i, dumatal  
ang bata,i, mahalín at paalagaan.

Di co pag-aanhin quinalong nang agad  
batang si Silvestre na cahabag-habag  
agad nang omoui s canilang Ciudad  
ipinagsisiua,t, mabuhay ang hañgad.

Paglacad nila,i, siya cong sabihin  
nang sa Monte-Cristo nang sila,i, dumating  
pagoui sa Reino nang pagtutumulin  
sumilong sa isang cahoy na malilim.

Dito sa paghinto ay siyang pag-iyac  
nang nasabing bata na cahabag-habag  
nang amang may candong ay liliñgaplñgap  
na di matutuhan ang gagauing dapat.

Isinaloob nang ito,i, nagugutom  
uala naman siyang sucat ipainom  
guinaua,i, lumuhod sa puno ng cahoy  
bata,i, inihain sa Dios na Poon.

Dios co (aniya,t,) masintahing Jesus  
ang habag sa amin ay ipagcaloob  
sa malaquing gutom nang anac cong irog  
magdalita ca po maauaing Dios.

Dili бага icao maauaing Pastor  
sa tanang ovejas dating mapag-ampon  
lautan nang aua aco,t, itong sangol  
sucat sa tulong mo,i, mapauí ang gutom.

Nagtaglay rin habag mapagquipquip  
dito sa lumuñgoy na cahapis hapis  
bata,i, nacatulog cusang natahimic  
hangang sa ang arao lumipas ang init.

Sabihin ang lugod sa anac na guilio  
at pasasalamat nang amang may angquin  
cun muling umiyac agad cacaluñgin  
sa Lañgit ay agad cusang ihahain.

Ano,i, nang lumipas ang sicat nang arao  
nagtuloy na silang omoui nang bayan  
capagdating doon sa caniyang bahay  
inilaan uaña tanang casangcapan.

Sichiuá ay agad siyang napahanap  
na magpapasuso sa caniyang anác,  
sabihin pa baga ang lacas nang pilac  
cahima,t, malayo darating na cag-yat.

Pinaalagaan batang si Silvestre  
nang caniyang ama, toua,i, di masabi  
ang pagcacandili ay lubhang mabuti  
di finutulugan sa arao at gabi.

Caya ñgá,i, sa apat na may catungeulan  
nang pag-aalaga sa sangol na mahal  
sila,i, paparejong naghahalinhinan  
nang sila,i, sa Padre nang di mauicaan.

Lacas nang paglaqui parang binubunot  
ang sangol na bata na calugod-lugod  
pitong taong edad ano,i, nang maabot  
unang itinuro,i, pagtauag sa Dios.

Isinunod naman na pinaaralan  
nang sulat ang batang loob na timtiman  
sa tulot nang Lañgit ay nacaaninao  
nang ucol at dapat nang pagca binyagan.

Guinaua nang ama,i, pinapag-estudio  
malaqui ang toua,t, matalas ang ulo  
ano,i, nang sumapit hustong labing tatlo  
edad ni Silvestre magbabagong tauo.

Isang arao bagang ualang clase  
umoui sa bahay itong estudiante,  
lumapit sa Padre,t, ang ipinagsabi  
dinguin po ni ama, na cun mangyayari.

Ang tugon nang ama sa anac na hirang  
;ano baga bunso ang iyong tuturan?  
hayo,t, sabihin mo,t, nang aquing maalaman  
sa pag-aaral mo,i, ;anong caculañgan?

;Hindi po sa gayon sa anac na badya  
sa sariling buhay aco,i, nagtataca  
totoo at tunay ama co,i, quilala  
ñguni,t, di co batid ang mahal cong Ina!

Marami at madla aquin pong talastas  
na sila,i, mayroong inang tinatauag  
ñguni,t, ama nila,i, hindi natatatap  
;di aco sa mundo nito ay baligtad!

Itong Padre Juan nagtaglay nang lunos may luha ang mata na naghihimutoc ayon sa pag-usig nang anac na irog ang paguiguing tauo,i, ibig ding matalos.

Guilio cong esposa ano dimo diñgig ang pag-uusisa nang anac tang ibig, anomang ligalig lubha cang tahimic sa quinalalag-yan mong Paraiso,t, Lañgit.

Ang iba rao bata ama,i, diman batid ñguni mayroon ding inang nagquiquipquip, calagayan niya,i, tila nahahapis alaňgan sa mundo,t, tila nababalic.

Ano at ang sugat sa puso,i, nasalang ito ay bahao nang malaon nang arao, sa minsan saguila nitong cahapisan sa hapdi nang saquit sinariuang tunay.

Ang dalita,t, saquit nalagac sa aquin narito sa puso at sasaquilsaquil at hindi payagan payapa,i, tamuhin haňgad na palagui buhay co,i, maquitil.

¡O mapagcandili bunying Padre Eterno na ama ñgang tunay nang Divino Verbo, acong tumatauag pagcalooban mo lauitan nang iyong mahal na saclolo!

Bunso co ay dinguin at aqing tuturan nangyari sa amin niyong dacong arao nang dito sa mundo ang ina mo,i, buhay pipi ang dila co, ¡Virgen ay tuluňgan!

Ang ina mong mahal nang nabubuhay pa ni hindi pa Padre ang iyong ama tatlong puong taon na cami nagsama matrimonio namin ay hindi nagbuňga.

Aqing sinanguni ang ina mong mahal mahaňgay (anaquin) tayo,i, maghiualay pagsasama nating mahaba nang arao itong matrimonio,i, hindi nagnanaonao.

Sa aqing hicayat napaayon siya caya,t, ang guinaua,i, nasoc sa Beata aco namang yari sa clase tumumpa inabot nang palad cumanta misa.

Di caalam-alam nang humabang arao  
ualana sa loob unang dinaanan  
nang isang umagang aco,i, na sa altar  
may isang Bēatang nasoc sa simbahan.

Cahit calahati ang dinatnang misa  
caniyang inabot doon sa pagsimba  
caya,t, pagcatapos aco sa Sacristia  
ay napasalamat sa Dios na Ama.

Sa doroon silla aco,i, lumueloc  
di carīngatdiñgat ay siyang pagpasoc  
nito ñgang Beata sa paa,i, lumuhod  
sa mata ang luha ang catulad ay agos.

Aco sa sarili ay nagdalang habag  
pinapagtindig co,t, cusang siniyasat  
ang sagot sa aquin ¡ó esposong liyang!  
icao ñga ang sadya na pinaghahanap.

Aniya,i, ¡esposo na casi at irog!  
na pinangugulan nang maraming pagod  
acong esposa mo ñgayong lumuluhog  
mangyaring payagan ang hiñgi nang loob.

¡Baquit at esposo ang bati sa aquin?  
siyang naging sagot sa ina mong guilio  
nag-uica pang muli siya at nagturing  
¡aco,i, si Maria na asauang anquin!

Di co na habaan aming pag-uusap  
nang mañga matuid nagsalasalabat  
naging dulo nito cami ay humarap  
at pahahatulan sa Papang marilag.

Di lubhang saysayin cami ay nagtuluyan  
amin sinagasa ang init nang arao  
sa bundoc nang Silva nang cami dumatal  
sandaling tumiguil at nagpahiñgalay.

Sa harap ñg simoy nang hañging malamig  
cusang nacatulog ang ina mong ibig  
ano,i, nang lumipas sa arao na init  
nang aqing pucauin bangeay ¡ay lañgit!

Baquit nagunita ang aqing esposa  
nasaan ca irog ¡ó Dios na Ama!  
aco,i, hulugan mo nang mahal na gracia  
bigyang aliualas ang aqing hiniñga.

Bunso co ay dinguin nangyari sa amin  
ñg maguing bangcay na ang ina mong guilio  
doon ay ano pa ang aquing gagauin  
cundi ang marapat ay cusang ilibing.

At aco,i, nagtuloy humarap sa Papa  
sinabi ang dahil nang aming demanda  
naguing cahatulan bilang na parusa  
ang aco,i, magbalie sa bundoc nang Silva.

Aco,i, pinagaua nang bahay bahayan  
doon sa ibabao nang pinaglibiñgan,  
at pinapagbaon siyam na tinapay  
siyam namang tasa ang tubig na taglay.

Ito,i, husto na sa aqui,i, sustento  
sa siyam na buan na titira aco,  
ang hihiga,i, lupa,t, siyang babaniguin co  
upang ding mamuñga yaong matrimonio.

Di co pasayurin ang ganitong hiras  
cun magunita co buhay co ay pupulas,  
dumating ang arao sa Dios na atas  
pumutue ang lupa,t, bangcay ay lumabas.

Nang aquing maquita ang ina mong mahal  
at icao ñga bunso ang siyang cabuntisan  
sa bagong pagputoc sa sinisicatan  
nang arao sa iyo,i, pañgañganac naman.

Doon ang ina mong pagtunghay sa mundo  
quinalong na quita,t, binalot nang manto  
sa libing iniuan ang sintang ina mo  
at icao,i, dinala sa Papa Gregorio.

Ang iba pang bagay anhin pang saysayin  
icao ñga ang buñga nami,t, naguing supling  
niyong matrimonióng munti nang malaiing  
hangan dito irog jay bunso cong guilio!

Yayamang tanto na ñgayo,t, iyong tatap  
icao ay sa Dios nama,i, catatauag,  
sa ama,i, sumagot causap na anac  
ang luha sa mata,i, nagecaanlalaglag.

Ngayon nabatid co jay ama cong mahal!  
sa nangyaring buhay ni inang namatay  
nagpupumiglas na yaring cabaitan  
magsabi sa iyo nitong catouiran.

¡Dañgan ca ama co ang siyang may sala  
niyong pagcamatay nang guilio cong ina,  
cundi naghiualay niyong pagsasama  
dili aco ñgayo,i, hindi alimura!

Sinong magsasabi na ang pagca tauo  
na di aco galing anac sacrilegio  
sauicaing ito,i, talastas banta co  
siyang calacaran at laman nang mundo.

Sinong di mahapis nang ganitong buhay  
ang lahat ay dapat sa aqui,i, masuelam,  
ina co,i, Beata nilang tinuturan  
tatauaguing ama isang Padreng mahal.

Tuturiñgan baga nang sino ma,t, alin  
na sa matrimonio aco,i, doon supling,  
dito lamang ama,i, sucat mong tantoin  
aling dibdib caya ang hindi mairing.

Ang naging dahilan caya naghiualay  
matrimonio ninyo hindi nagnanaonao  
baquit nang loobin nang Dios na mahal  
aco,i, naging tauo ina co,i, patay.

Guinaua ni ama,i, hindi pinagnoynoy  
na parang nañguna sa Dios na Poon,  
ang isang halaman ó puno nang cahoy  
ibig, magea buñga,i, uala sa panahon.

Ito,i, ang catulad guinaua ni ama  
caya naghiualay niyaong pagsasama  
na hindi pa tulot nang Dios mamuñga  
yaong matrimonióng lubhang mahalaga.

Mapalad ca ñga po dito sa nasapit  
at na sa ligaya ang ina cong ibig,  
eun hindi ay tantong dito napahibic  
¡alalayan aco mataas na Lañgit!

Oo maibiguin ang ama cong mahal  
sa anac na irog nang pagpapalayao,  
di lalong magaling eun si ina,i, buhay  
¿cundañgan icao po ang maycasalanan?

Ang sagot nang ama ¡bunsong iniibig  
bauhan mo guilio ang sa inang hapis!  
siya,i, talastas cong hindi na lilihis  
at na sa payapa sa bayan nang Lañgit.

Di mo maialis ang sagot nang anac  
ang aco,i, tumaghoy sa ina cong liyag,  
¡ó Dios na Poon nang sangmaluanag  
ang nananagano,i, big-yang aliualas.

Cahimanauari ang ina cong pili  
na sasa bayan mó,t, lomolualhati,  
ang na gauang sala na malaqui,t. munti  
iyong patauarin sa pagecamali!

At gayon din naman ó Dios na hirang  
ang sa aquing amang gauang camalian.  
big-yan mo nang isip na caniyang matapao  
ang sala sa iyo ay ma pagsisihan.

At sa aquin Dios icao mahabag  
sa taghoy ay lunos nang capos cong palad  
yaring mañga mata,i, big-yan mong liuanag  
na icatututo sa Lañgit na landas.

Big-yan mo nang lacas at tapang ang dibdib  
ang lahat nang tueso ay aquing maraig,  
Virgeng maauain dating matangquilié  
alalayan mo po itong humihibic.

Sucac sa ñgalan mo ay nañgatatacot  
yaong sang infierno sa pañgiñgilabot  
dini sa alaboc ay houag itulot  
sa balon nang hibo ay houag mahulog.

Duñgoy at dalañgin nitong iyong campon  
ay ipagecaloob ang saclolo ñgayon.  
maligtaan naua ang hibo nang dragon  
niyong si Lucifer sa bayan nang apoy.

Ang pananalañgin aquin nang tiguilan  
ang sasabihin co itong Padre Juan,  
ang anac na ibig cusang ibinigay  
sa isang colegio at pinapag-aral

Itong si Silvestre malaqui ang gusto  
nitong pag-aaral nang pageestudio,  
saca ang isa pa,i, matalas ang ulo  
caya,i, quinalugdan nang caniyang maestro.

Nag-aaral doon ay lubhang marami  
cabagongtauohan mañga estudiante,  
sa narong lahat huli si Silvestre  
sa Lector pa nila ito,i, nagsisilvi.

Sa tulot nang Lañgit dito sa ulila  
palibhasa ito,i, mayroong devota,  
ang Santo Rosario nang Vírgen María,  
siyang guinagaua sa hapo,t, umaga.

Arao ay natacbo nitong pag-aaral  
ang unang marunong eag--yat linampasan  
caya ñga,t, ang lahat caescuelang tanan  
siya ay pinoon at naalang-alang.

Sampo nang maestro dito ay nagtaca  
sa talas nang ulo ni Silvestre baga  
caya ñga ang sabi cun sa dunong niya  
ito ay labis nang cumanta nang misa.

Tatlóng puong taon maganap ang edad  
cumanta nang misa ang batang mapalad  
sabihin ang touang dili hamac-hamac  
nang amang nageandong sa bugtong na anac.

Linoob nang Dios daraquilang Ama  
cahit siya,i, Padre ay nag-aaral pa,  
naguing capalaran niya at planeta  
inatot ang gradong sa cardenal isa.

Ang Papa Gregorio dinatnan nang damdam  
talaga nang Dios at Poong may capal,  
palibhasa,i, siya bagang cahanganan  
sa caniya,i, binaui ang hiram na buhay.

Pagdaea,i, napatid ang tañgang hiniña  
sabihin ang gulo se templo nang Roma,  
nang mailibing na,i, nañgagcoro sila  
at ibig matanto ang maguiguing Papa.

Ang Padre Silvestre ay na sa hulihan  
nang lahat nang Padreng doo,i, nagdarasal  
sila,i, paraparang may candilang tañgan  
ñguni doo,i, uala cahit isang ilao.

Ay sa pagdarasal nang Padreng naroon  
quinacanta nila mahal na *Te Deum*  
naquitang banaag na aninong ibon  
ulo ni Silvestre ay doon tumuntong.

Sila,i, paparejong may candilang tañgan  
ñguni bucod tañgi cay Silvestre lamang  
na hindi ñga nila pinasisindihan,  
ang candilang hauac nagearoon nang ilao.

Ito ay milagrong talaga nang Lañgit sa pananalañgin nang mañga Santos Padres ipináquita rin canilang nabatid ang maguiguing Papa nilang ninanais.

At yaong tumuntong cay Silvestreng ulo ay yaon ang tunay na Espíritu Santo, ang Dios na Poon may talaga rito siyang mahalili sa Papa Gregorio.

Ano,i, nang matanto nang Padres na lahat ang Padre Silvestre ang Papang narapat ito,i, siyang loob nang Dios na hayag ang tungcol ay gauin doon sa mapalad.

Nanalañgin nañga ang lahat nang Padres puri,t, pasalamat sa Dios sa Lañgit, pinapagcaroong hindi iquinait nang canilang Papa na lubhang mabait.

Nang maguing Papa na grado ay macamtan sabihin ang toua niyaong si Padre Juan, palibhasa,i, anac niyang minamahal sa tinamong palad na lubhang marañgal.

Madlang pagpupuri nang Padres na lahat sa canilang Papa sa Lañgit na atas, sa arao at gabi hindi naglilicat nang pananalañgin sa Dios natauag.

Ano,i, nang lumaon at humabang arao yaong Padre Juan saquit ay dinatnan, ito,i, talaga rin nang Dios na mahal ibig nang bauian nang hiram na buhay.

Itong Padre Juan nang magcasaquit na malaqui ang lumbay nang mañga familia humanap nang gamot silang parapara mañga tapaltapal painom ang iba.

Nguni,t, ang alin mang gamot na idating dito sa maysaquit hindi macagaling, (anang iba roon) médico,i, tauagun ang caniyang damdam upang payapain.

Banday baga cayo sa tauong may pilac cun nagecacaquit visita,i, madalas, marami ang sulsol médico,i, tumauag na cahima,t, ilan pumaritong cag-yat.

Ang nañgagugulo na tauo sa bahay magpapasundo na nang médicong ilan hindi nila tanto itong cahanganan mé dico,i, pagpanhie pagod ay bayaran.

Cun ilan nang salin ang mé dicong naquiat cun ito,i, manaog easabay ay pilae ang Padreng may damdam lalong bumibigat saquit sa catauan buhay mauutas.

Sa panahong ito,i, aqing masasabi niyaong pa mang una siyang nangyayari interés sa tauo,i, halos maparati at ang pagtatapat uala sa marami.

Di caguinsaguinsa may isang dumating isa sa mé dico na pagagamutin pagpasoc sa cuarto,i, vinisitang tambing ang Padreng maysaquit ganito ang turing:

Nag-uica sa isa na tauo sa bahay uari parang tanong ó nunuhang alam ang Padreng maysaquit nacapagconfesar hayo na,t, sabihin at madaling turan.

Sagot nang tinanong di pa natatapos ay uala po naman sa aming nag-utos sa cuarto po,i, cami hindi pumapasoc bilin nang maysaquit sa ami,i, nageupeop.

Uica nang mé dico hayo at ñgayon din tauag ang confesor siya,i, compisalin ito ang una enog gamot na gagauin upang pumayapa ang dalang hilahil.

Ang abang maysaquit cahit ualang lacas matibay ang loob sa Dios tumauag laguing buchang bibig na ina-iiyac sa bayan nang Lañgit siya,i, maguing dapat.

Isusunod dito namang tatauagan esposang namatay siyang tataghoyan ay (aniya) guilio cun icao ay buhay dili aco ñgayon iisa ang damdam.

Ngayong narian ca sa payapang bayan at aco sa mundo dito ay naiuan dalaua ang saquit na quinacalaban isa ang lagae mo saca yaring lagay.

Tuluñgan mo ibig acong dumalañgin  
sa Dios na Poon at sa Inang Virgen  
sa nagauang sala aco,i, patauarin  
sa camay nang dragon aco ay agauin.

¡O divina gracia at talang masinag  
na Ina ni Jesus sumacop sa lahat  
Inang mapagcupcop sa tanang ovejas  
amponin mo ñgayon itong tumatauag!

¡O lahat nang Santos, at mañga Mártires  
mañga carurucan nang Dios sa Lañgit  
cayo,i, paraparang ñgayo,i, magmasaquit  
ihinñgi nang tauad sa Dios na ibig!

Saca icao naman ¡ó esposang liyag!  
dini sa puso co,i, di maagnasagnas  
cun loob nang Dios di na magluluat  
aco,i, sa payapang baya,i, mamamalas.

Bayaan na natin itong nananaghoy  
dito sa paghibic ay gagahol-gahol  
pagea,t, sa balisa nang dalang lingatong  
hiniñga,i, pumanao cun hindi nahabol.

Madalit, salita dumating pagdaca  
ang confesor бага na tinauag nila,  
nang canilang datnan ay babahagya na  
at malalagot na ang tañgang hiniñga.

Ang confesor bagang canilang tinauag  
ang mahal na Papa na tunay ñgang anac,  
nito ring maysaquit na may dalang hirap  
hindi mapanulos ang sa Papang lacad.

Cagyat nanicluhod ang mahal na santo  
sa poon at Dios nang sang universo,  
humihinñging aua,t, big-yan nang saclolo  
ang caniyang ama,i, macompisal dito.

Ipinagecaloob nang Dios na Ama  
anac ang cacalag nang sa amang sala  
ipinagsabi rin nitong papanao na  
sa mundo, ang lahat tanang gaña niya.

Sampong pagcatauo mañga pinagmulan  
nang Papa Silvestre anac niyang hirang  
at pagcatapos agad inoliohan  
siyang pagcalagot nang hiniñgang tañgan.

Malaqui ang lumbay nang mañga familia may pamanqui,t, pinsan, at may capatid pa bucod pa ang hapis nang mahal na Papa sapagea ñga yao,i, tunay niyang ama.

Itong pagcamatay nang mahal na mártir sinong di luluha eun doo,i, tumiñgin ang lahat nang angean nagpulos nang itim palatandang yao,i, tunay na pag-guilio.

Sa harap nang lahat ay ipinaquita misterio nang Dios na catacataca Arcángel San Gabriel lumapit pagdaca saca si San Miguel taglay ay espada.

Ang bangcay nang Padre cusang binantayan at ipinag-utos nang Dios na mahal bilin sa canila hangang sa libiñgan ang mahal na martir ay papatnubayan.

Di cariñgat-diñgat dumating din naman demoniong Satanás lilong tampalasan at si Asmodeo na lubhang sucaban caloloua,t, buhay siyang cucunin dao.

Dalauang Arcángel ang siyang sumagot sa mañga demonio na tacsil na loob cayo,i, hindi dapat ñgayong maghimasoc dito sa namatay at ito,i, sa Dios.

Sagot nang dalauang demoniong sucaban baquit cami aniyo,i, houag maquialam tingnan mo,t, narito sa aming listahan malaon nang arao ina-alagaan.

Tugon nang dalauang Arcángel nang Dios baquit iya,i, amin sa demoniong sagot bakuit iya,i, amin sa demoniong sagot dito,i, natititic sa libro asientos.

Malasi,t, tingnan mo cundi naguguhit iyang tauong iyan ay amin nang cabig uica ni San Miguel baquit matititic ito,i, dating campon nang Dios sa Lañgit.

Totoo,t, malaqui ang nagauang sala matrimoniong iñgat niualang halaga ñguni,t, tumangap nang lalong mapacla at parusang bigay nang Gregorio Papa.

Sa nagauang sala cahit malaqui man hinahamae bagang laqing cabayaran, ang parusang bigay siyam na tinapay, na pinapaghusto sa siyam na bouan.

Gayon din sa tubig ay siyam na tasa ang parusang bigay ito ay hamae pa, caya humayo na cayong palamara at ito ay tunay sa Dios na Ama.

Naguing buto,t, balat caniyang catauan ang tunay na martir ang macacabagay caya dapat namang bihisin pagcouan nang daquilang graciang camahalmahalan.

Ang sagot nang sucab na taga Averno pilit na cucumin ami,t, amin ito, dili babayaang maiuan sa inyo suedan ang anoman ang masapit dito.

Dico pag-aanhin sa pagtatalalan sila,i, para-parang nagmamatouiran ay siyang pagdating nang Virgeng maraňgal dalauang demonio,i, tambing nagliparan.

Yaong caloloua nang Padre,i, quinuha dinapit nang Angel dinala sa Gloria gayon din ang bangeay inihatid nila sa libiňgang hucay doon iniuan na.

Ano pa űga,t, doon humanga sa Laňgit ang cay Padre Juan calolouang ibig, at gayon din naman Beatang mariquit sila,i, naňgagpisan sa Santos mártires.

Ito ang nasapit at quinahinatnan nang sa mag-asauang dinaanang buhay, sala ma,i, malaqui na cun pagsisihan sa Dios na Poon may patauad naman.

Caya ang uica co ó maňga magulang at maňga capatid na naquiquiramdam, sino man sa inyo na cun magtataňgan niyaong matrimonio,i, houag sasuaan.

At nang cun cahima,t, hindi namumuňga matrimoniang bigay nang Santa Iglesia houag casuyaang yaong pagsasama cusang idalaňgin sa Virgen Maria.

Upang sa dalañgin magcaroong habag  
Inang magsing-ibig na Dios nang lahat  
itong matrimonio upang mamulaclac  
maguing paquinabang nang halamang iingat.

Ito,i, carampatan ating pagtamanan  
isilid sa puso at sa gunamgunam  
itong matrimonio,i, cun mapag-iñgatan  
ay dito sa mundo,i, isang cabanalan.

Ang ating hañgarin ang magandang gaua  
siyang isaisip sa puso,i, itala  
sa hibo nang dragon ay houag paraya  
sa Dios ay laguing humiñgi nang aua.

Pagea,t, itong mundo ay bayan ñg saquit  
ang pain nang tucso,i, laguing nacacatig  
caya sino ca man guilio na capatid  
sa anyaya niya ay houag paraig.

Ang ganitong bagay nang houag sapitin  
na cahiyahiya sa sino ma,t, alin  
lalaqui,t, babayi may asauang anquin  
itong matrimonio ay pacamahalin.

Paiñgat-iñgatan parang isang rosa  
na iminacetas sa jardineria,  
cun ito,i, masira malooy malanta  
sampong puno,t, ugat ay ualang halaga.

Nguni,t, cun mabuti ang pag-aalaga  
malago ang puno ang daho,i, sariua  
saña,i, malalabay sa lilim sagana  
sinomang tumiñgin pilit matotoua.

Ito ang catulad at nacacabagay  
yaong mag-asaua sa loob nang bahay  
cun ang pagsasama,i, malinis mahusay  
sampong ama,t, ina ay napupurihan.

Sucacat hangan dito,i, aquing titiguilan  
yayamang tanto na sa buhay na hiram,  
ang aquing sabihin ñgayo,t, pagbalican  
ang Papa Silvestreng may hapis na taglay.

Madla ang caniya na buntong hiniña  
cun madilidili siya,i, nag-iisa,  
pagcabata co na,i, ulila sa ina  
amang nag-aruga ñgayo,i, namatay pa.

Maraming totoong aqing capalaran nang dito sa mundo,i, nagcaragan-dagan may toua,t, may hapis, saya,t, cahirapan aqing nang tinamo na ualang nilisan.

Ngayo,i, ano caya na sucat cong gauin ualang ibang dapat cundi manalañgin sa Dios na Poon at sa Inang Virgen sa Lañgit na bayan aco,i, papasuquin.

Gayon din po naman ¡ó Dios na Ama! ang Ama,t, Ina cong dito,i, namatay na papaguing dapatin sa mahal na gloria tinatabanan mo, ay mapaquisama.

Ang lahat nang tauo na sa mundo,i, buhay sampo pa nang hindi nañgabibimiagan malimalihin mo ang mañga hiligan loob nila,t, puso ang sambali,i, icao.

¡O Jesus na ibig magdala cang habag at cauaan mo ang iyong ovejas alang-alang Jesus sa lima mong sugat houag pabayaan sila,i, mapahamac.

Dili baga icao ¡ó Jesus na mahal nagcatauang tauo sa lupang ibabao nagtiis nang hirap, suntoc, sicad, tampal, pagsacop, pagtubos sa iyong quinapal!

Dili hinampas ca ¡ó Jesus na Poon! di lilimang libo ni Pilatong hucom ay dinalita mo nang macalag doon caming quinapal mong nasilo nang dragon.

Dili icao Jesus ang siyang nagpasan nang malaquing Cruz sa bigat ay sacdal ang sang mundong sala,i, doon nalululan aua mo sa lahat inapo ni Adan.

Dios patauarin itong boong mundo patauad patauad nang sala sa iyo nagpacamatay ca dahilan sa tauo at pinangugulan mahal na dugo mo.

Aco naman Dios ñgayo,i, patauarin sa nagauang sala na munti,t, malaqui lauitan nang aua ang napacacasi nagmamaca amo abang si Silvestre.

Aquing titiguilan itong pagtuturing sa mahal na Papa nang pananalañgin ang ipahahayag ñgayong sasabihin ang uacas at hanga buhay na narating.

Ano,i, sa mahabang panahon at arao nang maña pagtauag sa Dios na mahal isang hating gabing lubhang calaliman ang mahal na Papa ay nagugulaylay.

Siya ay pinucáo at cusang guinising nang isang pañarap na sa Lañgit galing di anhin ang sabi huag pacahimbing ñgayo,i, malapit nang buhay mo,i, cucunin.

Hindi na natulog ang mahal na Papa di anhin na lamang ay maumaga na madali,t, salita,i, nang lumiuanag na nasoc sa simbahan at siya,i, nagmisa.

Ang mahal na misa ano,i, nang matapos ay nagpasalamat sa Poong cay Jesus at sa maña pajes bilang iniutos na tauaguing lahat cardenal Obispos.

Utos palibhasa nang mahal na Papa lahat nang tinauag dumating pagdaca nang nagecabilog ay ipinagbadya nang gabing lumipas ang pañarap niya.

Sa lahat nang Padre na doo,i, caharap ang uica sa tanan na ipinañgusap aco,i, paalam na aquing maña liyag at aco sa Dios dagdagan ang tauag.

Nang ito,i, masabi pumasoc sa cuarto dito napatiguil siyang naging dulo ang lahat nang Padre nama,i, nañgagcoro naging catapusan uica,i, LAUS DEO.



## TAGUBILIN

Sa sinoman siyang may nasang maganda lalaquit, babaying ibig mag-asaua tibayan ang dibdib nang paquiquisama sa hibo,i, nang hindi pasuqing hamae na.

Ang ibang dumaos ay houag parisan sa camunting sira ay magcaca-auay ang sa mag-asauang gauing carampatan sa gabing pagtulog doon ang pañgaral.

At gayon din naman huag na gagauin escándalong gaua,i, mahalay sa atin ang pula at cutya malayong dumating. lalo,t, may devota sa mag Inang Virgen.

Caya ñga ang dapat ang gauing maganda ay mañgag devocion tungeol mag-asaua ang Santo Rosario sa hapo,t, umaga siyang ihahandog sa Virgen María.

Nang huag mahulog sa panirang hibo ang lahat nang tueso nang mañgagsilayo sucat hangan dito yamang inyong tanto piliin ang balang matamis sa puso.

Saca icao naman na cun mangyayari duñgoy co sa inyo na ipinagsasabi sa mag-Inang Virgen ay ipamintacasi big-yang aliualas ang M. A. S.



# MGA AWIT

- |                           |                          |
|---------------------------|--------------------------|
| 1. Florante at Laura      | 21. Consuelo             |
| 2. Ibong Adarna           | 22. Mataas na Isip       |
| 3. Celira                 |                          |
| 4. Florentina             | COMEDIA                  |
| 5. Marcela                | 23. Garibal              |
| 6. Doña Maria (sa ahas)   | 24. Sesmundo             |
| 7. Juan Tiñoso            | 25. Martir de Golgota    |
| 8. Igmidio                | I at II Tomo             |
| 9. Haring Patay           | KAPAMPANGAN              |
| 10. Florinio              | 26. Igmidio              |
| 11. Jaime del Prado       | 27. Tiñoso               |
| 12. Blanca Flor           | 28. Doce Pares           |
| 13. Alimango              | 29. Rodrigo de Villa     |
| 14. Alejandro at Don Luis | 30. Busog ni Cupido      |
| 15. Sta. Ana              | 31. Aliwan               |
| 16. Isabela               | 32. Konde Iglos          |
| 17. Griselda              | 33. Pugot Negro          |
| 18. San Alejo             | 34. Don Juan de Berbania |
| 19. Sta. Rejina           | 35. Marcela              |
| 20. Magkapatid            | 36. Florentina           |

Ipinagbibili sa No. 120 Rodriguez Arias, San Miguel.

**MODESTA LANUZA.**